



Na osnovu člana 22 Statuta Brčko distrikta BiH – prečišćeni tekst (Službeni glasnik Brčko distrikta BiH, broj 2/10), Skupština Brčko distrikta BiH na I nastavku 34. redovne sjednice održanom 21. decembra 2022. godine, usvaja

ZAKON
O IZMJENAMA I DOPUNAMA ZAKONA O OBRAZOVANJU
U OSNOVNIM I SREDNJIM ŠKOLAMA BRČKO DISTRIKTA BOSNE I
HERCEGOVINE

Član 1

U Zakonu o obrazovanju u osnovnim i srednjim školama Brčko distrikta Bosne i Hercegovine (Službeni glasnik Brčko distrikta BiH, broj: 20/20 – prečišćeni tekst i 24/20) u članu 5 stav 4 mijenja se i glasi:

„(4) Na prijedlog Odjeljenja, Vlada Brčko distrikta Bosne i Hercegovine (u daljnjem tekstu: Vlada Distrikta) donosi podzakonski akt kojim se utvrđuje nadležnost tripartitnog savjetodavnog vijeća“.

Član 2

U članu 7 stav 5 mijenja se i glasi:

„(5) Osnivanje, organizacija, trajanje i pohađanje nastave u paralelnim školama detaljnije se reguliše podzakonskim aktom, koji donosi Vlada Distrikta na prijedlog šefa Odjeljenja.“

Član 3

U članu 9 iza stava 3 dodaju se novi stavovi 4, 5, 6 i 7 koji glase:

„(4) Nadležni organ i osnivač mogu dodijeliti nagrade za odlično učenje i vladanje, kao i za postignute visoke rezultate u sportskim i drugim takmičenjima za učenike osnovnih i srednjih škola u Distriktu.

(5) Kriterije za dodjelu nagrada donosi Vlada na prijedlog šefa Odjeljenja za obrazovanje.

(6) Odjeljenje može stipendirati učenika u srednjoj školi, ako su osigurana novčana sredstva u budžetu Brčko distrikta BiH za tu namjenu.

(7) Stipendiranje iz stava 6 ovog člana vrši se u skladu s odlukom koju donosi Vlada Distrikta na prijedlog šefa Odjeljenja.“

Član 4

U članu 10 iza stava 3 dodaju se novi stavovi 4, 5, 6 i 7 koji glase:

„(4) Srednje obrazovanje nije obavezno.

(5) Srednje obrazovanje se može organizovati i u paralelnim školama.

(6) Pod paralelnom srednjom školom podrazumijeva se škola koja nije obavezna i koja se pohađa istovremeno sa srednjom školom.

(7) Osnivanje, organizacija, trajanje i pohađanje nastave u paralelnim srednjim školama detaljnije se reguliše podzakonskim aktom koji donosi Vlada Distrikta na prijedlog šefa Odjeljenja.“

Dosadašnji stavovi 4, 5 i 6 postaju stavovi 8, 9 i 10.

Član 5

U članu 12 stavovi 5 i 6 se mijenjaju i glase:

„(5) Škole čiji je osnivač Distrikt organizuju obrazovanje odraslih u okviru svojih registrovanih djelatnosti koje je verificovalo Odjeljenje.

(6) Obrazovanje odraslih detaljnije se reguliše Zakonom o obrazovanju odraslih u Brčko distriktu Bosne i Hercegovine.“

Član 6

U članu 13 stavu 1 riječ: „književni“ se briše.

Član 7

Član 14 mijenja se i glasi:

Član 14

(Obrazovanje učenika pripadnika nacionalnih manjina)

„Obrazovanje učenika pripadnika nacionalnih manjina ostvaruje se u skladu s odredbama ovog zakona i Zakona o zaštiti prava pripadnika nacionalnih manjina u Brčko distriktu Bosne i Hercegovine.“

Član 8

U članu 24 stav 3 mijenja se i glasi:

„(3) Odjeljenja koja imaju učenike u inkluzivnoj nastavi mogu imati najviše 18 učenika.“

Iza stava 3 dodaje se novi stav 4 koji glasi:

„(4) Izuzetno, ako učenici s poteškoćama u razvoju imaju angažovane asistente u nastavi broj učenika može biti i do 29 u odjeljenju.“

Dosadašnji stavovi 4 i 5 postaju stavovi 5 i 6.

Član 9

U članu 34 stav 5 mijenja se i glasi:

„(5) Agencija za predškolsko, osnovno i srednje obrazovanje Bosne i Hercegovine nadležna je za izradu, implementaciju, praćenje, evaluaciju i poboljšanje zajedničkog jezgra nastavnih planova i programa.“

Član 10

Član 38 mijenja se i glasi:

„Član 38

(Prekid odgojno-obrazovnog rada)

- (1) U toku školske godine ne smije se prekidati odgojno-obrazovni rad.
- (2) Iznimno, odgojno-obrazovni rad može se prekinuti, odnosno drugačije organizovati, u slučaju:
 - a) elementarne nepogode,
 - b) epidemije,
 - c) zarazne bolesti,
 - d) drugih izuzetnih razloga.
- (3) Odluku o drugom obliku odnosno načinu organizacije odgojno-obrazovnog rada donosi šef Odjeljenja.
- (4) Odluku o prekidu odgojno-obrazovnog rada, ukoliko se utvrdi da ne postoje uslovi za organizovanje drugog načina odgojno-obrazovnog rada, donosi šef Odjeljenja uz prethodnu saglasnost Vlade Distrikta.
- (5) Izgubljeni nastavni dani uzrokovani prekidom iz stava 4 ovog člana se nadoknađuju do 30. 6. tekuće godine.
- (6) Slučajevi iz stava 2 tačke d) ovog člana utvrđuju se podzakonskim aktom koji donosi Vlada Distrikta, na prijedlog šefa Odjeljenja.“

Član 11

Iza člana 38 dodaje se novi član 38a koji glasi:

„Član 38a

(Drugi način organizacije odgojno-obrazovnog rada)

- (1) Odgojno-obrazovni rad se može, u skladu s članom 38 stavom 2 ovog zakona organizovati i na drugačiji način, kao što je odgojno-obrazovni rad na daljinu.
- (2) Realizacija, vrednovanje, ocjenjivanje, te vođenje dokumentacije i evidencije u osnovnim i srednjim školama za vrijeme trajanja drugih načina rada iz stava 1 ovog člana utvrđuje se podzakonskim aktima koje donosi Vlada Distrikta na prijedlog šefa Odjeljenja.“

Član 12

U članu 39 stav 6 mijenja se i glasi:

„(6) Izvještaji iz stavova 4 i 5 ovog člana dostavljaju se na obrascima čiji sadržaj utvrđuje Odjeljenje.“

U istom članu iza stava 6 dodaje se novi stav 7 koji glasi:

„(7) Obrazac godišnjeg programa rada škole donosi šef Odjeljenja.“

Član 13

U članu 40 iza stava 3 dodaje se novi stav 4 koji glasi:

„(4) U izuzetnim slučajevima, ukoliko je to u najboljem interesu učenika, šef Odjeljenja može donijeti odluku o skraćenom nastavnom satu, koji ne može trajati kraće od 30 minuta.“

Dosadašnji stavovi 4 i 5 postaju stavovi 5 i 6.

U novom stavu 6 tački a) alineji 1) riječi: „(minimum 180 minuta)“ brišu se.

Član 14

U članu 41 stav 3 mijenja se i glasi:

„(3) U izuzetnom slučaju, nastavna godina može se završiti i bez realizacije fonda nastavnih časova predviđenih nastavnim planom i programom, zbog opravdanih razloga i na osnovu odluke koju donosi Vlada Distrikta na prijedlog šefa Odjeljenja.“

Član 15

U članu 42 stavovi 1 i 2 mijenjaju se i glase:

„(1) Pored redovne nastave, u osnovnoj i srednjoj školi organizuju se vannastavne aktivnosti učenika radi razvijanja i produbljivanja njihovih stvaralačkih sposobnosti i sticanja pozitivnih navika i vještina, kao i učenja drugih stranih jezika koji nisu propisani nastavnim planom i programom“.

(2) Zadaci i programski sadržaji vannastavnih aktivnosti utvrđuju se godišnjim programom, a u skladu s pedagoškim standardima.“

Član 16

Član 48 stav 1 mijenja se i glasi:

„(1) Upis u osnovnu školu vrši se na osnovu javnog poziva Odjeljenja, a pri upisu djeteta u prvi razred prilaže se potvrda o prebivalištu, kojom se dokazuje pripadnost upisnom području te škole.“

Član 17

U članu 52 stav 3 mijenja se i glasi:

„(3) Obrazovanje učenika iz stavova 1 i 2 ovog člana utvrđuje se pravilnikom koji donosi Vlada Distrikta na prijedlog šefa Odjeljenja.“

Član 18

U članu 56 stav 6 mijenja se i glasi:

„(6) Uslovi i način upisa u srednju školu utvrđuju se podzakonskim aktom, koji donosi Vlada Distrikta, na prijedlog šefa Odjeljenja.“

Član 19

U članu 69 stav 4 mijenja se i glasi:

„(4) Opisnim ocjenama ocjenjuju se učenici prvog razreda osnovne škole.“

Član 20

U članu 73 iza stava 3 dodaje se novi stav 4 koji glasi:

„(4) Učeniku kojem nije bilo omogućeno pohađanje dopunske nastave ne može se zaključiti ocjena nedovoljan (1).“

Dosadašnji stav 4 postaje stav 5.

Član 21

U članu 97 stav 1 mijenja se i glasi:

„(1) Odjeljenje je dužno prije početka nastave za sve zaposlene u školama organizovati ljekarske preglede i to:

- a) u svakoj školskoj godini sanitarni pregled,
- b) svake dvije godine sistematski ljekarski pregled.“

Član 22

Iza člana 97 dodaje se novi član 97a koji glasi:

„Član 97a
(Preventivni ljekarski pregledi učenika)

- (1) Odjeljenje može, do kraja prve trijade, preventivno organizovati oftalmološke i stomatološke preglede.
- (2) Troškove pregleda snosi Odjeljenje.“

Član 23

U članu 99 stav 1 tačka c) mijenja se i glasi:

„c) 30 časova za saradnika u nastavi.“

Član 24

U članu 100 iza stava 3 dodaje se novi stav 4 koji glasi:

„(4) Izuzetno od stava 1 i stava 3 ovog člana, nastavnik, stručni saradnik, saradnik u nastavi i asistent u nastavi može koristiti godišnji odmor neposredno nakon isteka porodiljskog odsustva, odnosno dugotrajnog bolovanja.“

Član 25

U članu 101 stav 3 riječi: „najduže do tri mjeseca“ zamjenjuju se riječima: „do kraja polugodišta.“

Član 26

U članu 102 stav 1 mijenja se i glasi:

„(1) Nastavnik, stručni saradnik, saradnik u nastavi i asistent u nastavi dužni su da se usavršavaju s ciljem što uspješnijeg ostvarivanja i unapređivanja obrazovnog-vaspitnog rada u skladu s programom stručnog usavršavanja.“

Iza stava 2 dodaju se novi stavovi 3, 4, 5, 6 i 7 koji glase:

„(3) Direktor škole i pomoćnik direktora škole dužni su se stručno usavršavati u svrhu što uspješnijeg ostvarivanja i unapređivanja odgojno-obrazovnog rada.

(4) U skladu s potrebama usavršavanja direktora i pomoćnika direktora škole šef Odjeljenja određuje oblasti stručnog usavršavanja za period od četiri godine.

(5) Nosilac organizacije i realizacije stručnog usavršavanja nastavnika, stručnih saradnika, saradnika u nastavi, asistenata u nastavi, direktora i pomoćnika direktora škole je Pedagoška institucija.

(6) Stručno usavršavanje ostvaruje se kroz programe obuke, stručne skupove, savjetovanja, ljetne i zimske škole, stručna i studijska putovanja, međunarodne i regionalne skupove i kroz programe cjeloživotnog učenja.

(7) Stručno usavršavanje odgojno-obrazovnog osoblja škola uvrštava u godišnji program rada škole.“

Član 27

U članu 107 stav 2 mijenja se i glasi:

„(2) Nastavnik, stručni saradnik, saradnik u nastavi i asistent u nastavi na osnovu ocjene stiču zvanje nastavnik-mentor i nastavnik-savjetnik, stručni saradnik-mentor i stručni

saradnik-savjetnik, saradnik u nastavi-mentor, saradnik u nastavi-savjetnik, asistent u nastavi-mentor i asistent u nastavi-savjetnik“.

U stavu 4 ovog člana iza riječi: „i stručnom ocjenom“ brisati riječi: „u potpunosti zadovoljava očekivanja ili“.

Član 28

Iza član 110 dodaje se novi član 110a koji glasi:

„Član 110a

(Eksterna evaluacija učeničkih postignuća)

- (1) Eksterna evaluacija učeničkih postignuća (u daljnjem tekstu: eksterna evaluacija) je proces pedagoškog, informativnog i instruktivnog karaktera koji obuhvata ispitivanje, praćenje i analizu redovne nastave te služi pregledu, procjeni i razumijevanju procesa i ishoda učenja.
- (2) Za ispitivanje učeničkih postignuća eksternom evaluacijom angažuju se vanjski saradnici za svaki nastavni predmet u skladu s nastavnim planovima i programima Distrikta koji se sastoje od zajedničke jezgre i dijela nastavnog plana i programa koji se kreira u školama te standardima učeničkih postignuća Agencije za predškolsko, osnovno i srednje obrazovanje.
- (3) Odjeljenje za obrazovanje osigurava budžetska, prostorna i druga materijalno-tehnička sredstva za provođenje eksterne evaluacije.
- (4) Planiranje aktivnosti i nadzor nad provođenjem eksterne evaluacije provodi Odjeljenje.
- (5) Eksterna evaluacija bliže se uređuje podzakonskim aktom koji donosi Vlada Distrikta na prijedlog šefa Odjeljenja.“

Član 29

U članu 117a iza stava 2 dodaju se novi stavovi 3 i 4 koji glase:

- „(3) Po osnovu ugovora iz stava 2 ovog člana mogu se angažovati i asistenti u odgojno-obrazovnom radu.
- (4) Zahtjev za angažovanje asistenta u školi upućuje škola na osnovu potreba izraženih od strane stručnog tima za svakog učenika koji posjeduje rješenje o kategorizaciji ili propratnu medicinsku dokumentaciju ili je u procesu opservacije stručnog tima škole.“

Član 30

U članu 117b stavu 1 iza tačke b) dodaje se nova tačka c) koja glasi:

- „c) potreba angažovanja asistenta u odgojno-obrazovnom radu, u svrhu poboljšanja uslova i kvaliteta obrazovanja učenika s posebnim potrebama;“.
- Dosadašnja tačka c) postaje tačka d).

Član 31

Član 118 mijenja se i glasi:

„Član 118

(Pododjeljenje za ljudske resurse i zapošljavanje u obrazovnim institucijama)

„(1) Pododjeljenje za ljudske resurse i zapošljavanje u obrazovnim institucijama u okviru Odjeljenja (u daljnjem tekstu: Pododjeljenje za ljudske resurse) vodi personalnu evidenciju i učestvuje u postupku zapošljavanja direktora, pomoćnika direktora, nastavnika, stručnog saradnika, saradnika u nastavi, vanjskog saradnika i asistenata u nastavi u školama čiji je osnivač Distrikt.

(2) Pododjeljenje za ljudske resurse nadležno je za:

- a) predlaganje odluke o raspisivanju i poništenju internog oglasa ili javnog konkursa za izbor lica iz stava 1 ovog člana;
- b) primanje i razmatranje prijava;
- c) praćenje rokova propisanih zakonom;
- d) vođenje personalne evidencije za lica iz stava 1 ovog člana, što obuhvata:
 - 1) izradu i provođenje akata iz oblasti radno-pravnih odnosa, npr. ugovori, rješenja, odluke;
 - 2) ažuriranje baze podataka i osiguravanje procesa javnog oglašavanja;
 - 3) vođenje evidencije upražnjenih radnih mjesta na određeno i neodređeno vrijeme;
 - 4) učestvovanje u godišnjoj ocjeni zaposlenih;
 - 5) raspoređivanje lica iz stava 1 ovog člana s ciljem popunjavanja fonda nastavnih časova.“

Član 32

Član 119 mijenja se i glasi:

„Član 119 (Odbor za zapošljavanje)

- (1) Odbor za zapošljavanje (u daljnjem tekstu: Odbor) je organ koji vrši izbor nastavnika, stručnih saradnika, saradnika u nastavi, vanjskih saradnika i asistenata u nastavi u školama čiji je osnivač Distrikt.
- (2) Po svakom raspisanom konkursu ili internom oglasu, šef Odjeljenja imenuje Odbor koji se sastoji od pet članova, i to:
 - a) jednog člana, direktora ili pomoćnika direktora škole u kojoj se vrši izbor ili druge škole čiji je osnivač Distrikt;
 - b) dva člana iz Odjeljenja, od kojih je najmanje jedan zaposlen u Pododjeljenju za ljudske resurse i zapošljavanje, koji imaju najmanje istu ili višu stručnu spremu u odnosu na stručnu spremu radnog mjesta za koje se vrši izbor. Član Odbora iz Pododjeljenja za ljudske resurse i zapošljavanje je ujedno i predsjednik Odbora;
 - c) dva člana iz reda zaposlenih škole u kojoj se vrši izbor, na prijedlog školskog odbora, koji ima najmanje istu ili višu stručnu spremu istog ili srodnog smjera, odnosno struke u odnosu na stručnu spremu radnog mjesta za koje se vrši izbor.
- (3) Sastav Odbora mora odražavati sastav stanovništva.“

Član 33

Iza člana 119 dodaje se novi član 119a koji glasi:

„Član 119a
(Komisija za izbor direktora i pomoćnika direktora)

- (1) Komisija za izbor direktora i pomoćnika direktora (u daljnjem tekstu: Komisija) je organ koji vrši izbor direktora i pomoćnika direktora u školama čiji je osnivač Distrikt.
- (2) Za svaki raspisani javni konkurs gradonačelnik imenuje Komisiju koja se sastoji od pet članova, i to:
 - a) šefa Odjeljenja,
 - b) jednog člana, iz reda zaposlenih u Pododjeljenju za ljudske resurse, koji ima najmanje istu ili višu stručnu spremu u odnosu na stručnu spremu radnog mjesta za koje se vrši izbor,
 - c) jednog člana, iz reda zaposlenih u Pododjeljenju za predškolsko i osnovno obrazovanje ili Pododjeljenju za srednje obrazovanje, koji ima najmanje istu ili višu stručnu spremu u odnosu na stručnu spremu radnog mjesta za koje se vrši izbor,
 - d) dva člana, iz reda zaposlenih neke škole čiji je osnivač Distrikt, koji ima najmanje istu ili višu stručnu spremu u odnosu na stručnu spremu radnog mjesta za koje se vrši izbor.
- (3) Sastav Komisije mora odražavati sastav stanovništva.“

Član 34

Član 120 mijenja se i glasi:

„Član 120
(Nadležnosti Odbora i Komisije)

Nadležnosti Odbora i Komisije su:

- a) selekcija kandidata,
- b) zakazivanje i provođenje pismenog testiranja, odnosno usmenog intervjua,
- c) ocjenjivanje profesionalnih sposobnosti kandidata putem pismenog ispita i usmenog intervjua, demonstriranja znanja i vještina kandidata, a u skladu s Pravilnikom o zapošljavanju,
- d) sačinjavanje rang-liste intervjuisanih kandidata,
- e) donošenje odluke o izboru najuspješnijeg kandidata.“

Član 35

U članu 121 riječ: „Odbor“ u različitim padežima zamjenjuje se riječima: „Odbor, odnosno Komisija“ u odgovarajućim padežima.

Stav 7 ovog člana mijenja se i glasi:

„(7) Obavještenje o rezultatima izbora kandidata ističe se 15 dana na internetskoj stranici Odjeljenja u Vladi Distrikta.“

U stavu 12 ovog člana riječi: „duže od 60 radnih dana“ zamjenjuju se riječima: „duže od 90 radnih dana“.

Član 36

U članu 122 riječ: „Odbora“ zamjenjuje se riječima „Odbora, odnosno Komisije“.

Član 37

U članu 123 stavu 1 riječi: „odluka o imenovanju“ zamjenjuju se riječima: „rješenje o imenovanju.“

Stav 2 se briše.

Član 38

U članu 124 riječ: „Odbor“ zamjenjuje se riječima: „Odbor, odnosno Komisije“ u odgovarajućim padežima.

U stavovima 1, 2 i 3 ovog člana riječi: „odluka o imenovanju“ zamjenjuju se riječima: „rješenje o imenovanju“.

Član 39

Član 127 mijenja se i glasi:

„Član 127
(Direktor)

- (1) Direktor je odgovoran za rukovođenje školom i za vođenje pedagoških aktivnosti škole.
- (2) Za direktora i pomoćnika direktora škole može biti imenovano lice koje ima visoku stručnu spremu i najmanje pet godina radnog iskustva na poslovima odgojno-obrazovnog rada, uz mogućnost ponovnog imenovanja, s tim što isto lice ne može biti imenovano više od dva puta uzastopno.
- (3) Ukoliko direktor nije u mogućnosti da obavlja svoje dužnosti, zamjenjuje ga lice koje on ovlasti.
- (4) Direktora, odnosno pomoćnika direktora škole imenuje gradonačelnik na osnovu odluke Komisije na period od četiri godine, a razrješava ga dužnosti prije isteka mandata na prijedlog šefa Odjeljenja ili na vlastiti zahtjev.
- (5) Gradonačelnik razrješava direktora, odnosno pomoćnika direktora škole na prijedlog šefa Odjeljenja u slučajevima kada ne podnesu izvještaj o radu i rezultatima rada u skladu s rokom iz člana 128 Zakona ili ukoliko izvještaj o radu i rezultatima rada ne usvoji Vlada Distrikta.
- (6) Nakon isteka mandata ili prestanka dužnosti direktor, odnosno pomoćnik direktora škole, ima pravo da se vrati na radno mjesto nastavnika ili stručnog saradnika s kojeg je imenovan na mjesto direktora, odnosno pomoćnika direktora.

- (7) Za radno mjesto nastavnika ili stručnog saradnika upražnjeno imenovanjem direktora, odnosno pomoćnika direktora, raspisuje se javni konkurs na određeno vrijeme do isteka mandata direktora, odnosno pomoćnika direktora ili njegovog povratka na radno mjesto nastavnika ili stručnog saradnika.“

Član 40

U članu 128 stavu 1 tačka e) mijenja se i glasi:

„e) podnosi Vladi Distrikta, šefu Odjeljenja i školskom odboru izvještaj o radu i rezultatima rada najkasnije do 31. 8. tekuće godine za prethodnu školsku godinu;“.

Član 41

U članu 130 stav 1 mijenja se i glasi:

„(1) Nastavničko vijeće čine svi nastavnici, stručni saradnici, saradnici u nastavi i asistenti u nastavi škole, direktor i pomoćnik direktora.“

U stavu 2 istog člana iza tačke b) dodaje se nova tačka c) koja glasi:

„c) usvaja i analizira postignuti uspjeh učenika u učenju i vladanju nakon prvog i drugog polugodišta;“.

Dosadašnje tačke c), d), e), f), g), h), i), j), k), l) i m) postaju tačke d), e), f), g), h), i), j) k), l), m) i n).

U stavu 2 ovog člana iza nove tačke n) dodaje se nova tačka o) koja glasi:

„o) Nastavničko vijeće škole može iz opravdanih razloga osloboditi učenika pohađanja nastave uz molbu roditelja, odnosno staratelja do pet radnih dana.“

Član 42

U članu 144 stav 2 mijenja se i glasi:

„(2) Nakon donošenja odluke o osnivanju osnovne ili srednje škole, kao javne ustanove, koju donosi Skupština Distrikta, škola se upisuje u sudski registar do početka školske godine.“

Član 43

Član 147 mijenja se i glasi:

„Član 147

(Broj nastavnih časova u toku radne sedmice)

Broj nastavnih sati u toku radne sedmice u devetogodišnjoj osnovnoj školi utvrđuje se nastavnim planom i programom i ne može biti veći od sedam nastavnih časova redovne nastave dnevno.“

Član 44

Član 148 mijenja se i glasi:

„Član 148

(Povratak na radno mjesto stručnog saradnika)

Stručni saradnik koje je u vrijeme stupanja na snagu ovog zakona bio imenovan za direktora škole ili pomoćnika direktora škole ima pravo da se vrati na radno mjesto stručnog saradnika s kojeg je imenovan za direktora škole ili pomoćnika direktora škole.“

Član 45

Iza člana 148 dodaje se član 148a koji glasi:

„Član 148a

(Ograničavajuća odredba u odnosu na vrijeme)

Opisnim ocjenama ocjenjivat će se učenici prvog razreda od početka 2023/2024. školske godine.“

Član 46

Ovaj zakon stupa na snagu osmog dana od dana objavljivanja u Službenom glasniku Brčko distrikta BiH.

Broj: 01-02-6159/22

Brčko, 21. 12. 2022. godine

PREDSJEDNIK
SKUPŠTINE BRČKO DISTRIKTA BiH
Mr. sci. Siniša Milić